

Soraarnerussutisiaqalernissamut aaqqissuussinermut peqataasussaatitaaneq pillugu Inatsisartut inatsisaata allanngortinneqarnera pillugu Inatsisartut inatsisaat (Naliliineq, erseqqissaaneq aningaasartallu killiginik allannguineq)

§ 1

Soraarnerussutisiaqalernissamut aaqqissuussinermut peqataasussaatitaaneq pillugu Inatsisartut inatsisaanni nr. 21, 28. november 2016-imeersumi, Inatsisartut inatsisaatigut nr. 18, 30. november 2020-mi allanngortinneqartumi makkuninnga allannguisoqarpoq:

1. § 1, imm. 3, imatut oqaasertalerneqarpoq:

“ Imm. 3. Soraarnerussutisiaqalernissamut aaqqissuussineq soraarnerussutisiaqarnissamut aningaasaateqarfimmi Danmarkimi imaluunniit Kalaallit Nunaanni nalunaarsorsimaffeqartumi imaluunniit inuunermut soraarnerussutisiaqalernissamullu sillimmasiisarfimmi Danmarkimi imaluunniit Kalaallit Nunaanni nalunaarsorsimaffeqartumi imaluunniit aningaaserivimmi Kalaallit Nunaanni nalunaarsorsimaffeqartumi aalajangersimasumilluunnit ingerlatsiveqartumi pilersinneqassaaq, imm. 4-li imaluunniit uani Centralforeningen for Stampersonels Pensionsfond (CS-Pensionsfond) imaluunniit HKKF-fond takuuq. Piumasaqataavaq soraarnerussutisiaqarnissamut aningaasaateqarfik, inuunermut soraarnerussutisiaqalernissamullu sillimmasiisarfik imaluunniit aningaaserivik aningasanik ingerlatsineq pillugu inatsimmi ilaassasoq suliffeqarfillu pineqartoq ingerlatsinissamut Finanstilsynimit akuerineqarluni.”

2. § 2 immikkoortoq 4-tut ikkunneqassaaq:

“ Imm. 4. Imm. 2-mi nr. 1-4-mi aalajangersakkani akiliutit inuup tjenestemanditut soraarnerussutaanut tunngaviit ilaatinneqarput.”

3. § 3, imm. 1-4, imatut oqaasertalerneqarput:

“Inuup soraarnerussutisiaqalernissami aaqqissuussinermut akiliutai ukioq aningaasarsiorfimmi 2023-mi ileqqaarnissamut tunngavik 175.00 kr.-uppat qaffasinneruppalluunniit ileqqaarnissamut tunngaviup 7 procentianit annikinnerussanngilaq, imm. 2-li aamma 5 takukkit. Ukioq aningaasarsiorfimmi 2024-mit 2026-mut procenti ukiumut 1 procentimik qaffanneqartassaaq, taamaalilluni 2026-mi 10 procentiussalluni.

Imm. 2. Imm. 1-imi aalajangersagaq apeqqutaatinnagu inuup ukioq aningaasarsiorfimmi 2023-mi

soraarnerussutisiaqalernissamut aaqqissuuussinerminut akiliutai namminerisamik inuussutissarsiornermi sinneqartoortit 175.00 kr.-uppat qaffasinneruppataluunniit sinneqartoortit akileraarutaasussaatitaasut 5 procentiannit annikinnerussanngillat, imm. 5-imili takuuk. Ukioq aningaasarsiorfimmi 2024-mit ukiullu aningaasarsiorfiusuni tulliuttuni akiliutit namminerisamik inuussutissarsiornermi sinneqartoortit akileraarutaasussaatitaasut 6 procentiannit annikinnerussanngillat.

Imm. 3. Imm. 1 malillugu qaffasissuseq atuuttoq inuit ileqqaarnissamut tunngaviat 125.000 kr.-uppat assigiaamik 0 procentimit inuit ileqqaarnissamut tunngaviat 175.000 kr.-uppat 100 procentimut qaffanneqassaaq.

Imm. 4. Imm. 2 malillugu qaffasissuseq namminerisamik inuussutissarsiornermi inuit sinneqartoorutaat 125.000 kr.-uppat assigiaamik 0 procentimit inuit sinneqartoorutaat 175.000 kr.-uppat 100 procentimut qaffanneqassaaq.”

4. § 7-imi, imm. 2, “2.000 kr.” uunga allanngortinnejarpooq: “4.000 kr.”

§ 2

Inatsisartut inatsisaat ulloq 1. januar 2023 atuutilissaaq.

Namminersorlutik Oqartussat, ulloq 25. novembari 2022

Múte Bourup Egede
Naalakkersuisut Siulittaasuata

Namminersorlutik Oqartussat

Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviit
Naalakkersuisut

